

1497 turna pax fieret. Quibus profectis Antonius, eloquentia plane singulari, & præstanti vir ingenio, in itinere adversa valetudine interceptus, Genuæ interiit. Ejus morte audita Senatusconsultum factum est: Cum Antonius Bolduus Andreæ filius ex equestri ordine nullum laborem pro republica refugiens, legatione ad reges Hispaniæ suscepta in itinere mortem obierit, Senatui placere, ut Gabrieli Bolduo ejus filio primo quoque tempore in fano Patavino sacerdotium attribueretur, quo se fratresque suos alere commodius atque honestius possit. idque paulo post sacerdotium ab Alexandro Senatu petente Gabrieli est attributum. Miserant illi quidem reges superioribus mensibus ad Senatum per Franciscum Capellum legatum, qui ex Hispania domum redierat, Fortunatarum insularum unius regem dono mediusfidius non spernendo: quando ea porro elementi ora solidi, quæ in oceano Atlantico est circiter decies centena millia passus a continenti meridiem versus; multis ante Patres nostros sæculis ignorata, eorum indagatione ac diligentia, tota tum demum reperta, & colonis magistratibusque missis in potestatem redacta, orbi terrarum adjungitur. Eum regem publice Patavio enutriri Senatus jussit. Eodem fere tempore Patres certiores facti Franciscum imperatorem stipendio reipublicæ non confecto cum rege Carolo agere, ut se in suam militiam recipiat, illum ad urbem accersitum, ubi morbo, ne venire posset, impediri se respondit, Decemvirum decreto missum fecerunt. Is auri libras ducentas stipendiorum nomine ante tempus acceptorum reipublicæ debebat: salis autem crediti, nequedum soluti, centum. Accidit tamen, ut eo ipso missionis die infrequenti comitatu Franciscus Venetias appelleret, dictitans se a Ludovico ejusque genero Galeatio in fraudem ob invidiam conjectum, qui literas ab eo conscriptas finxissent, ad Patresque misissent, quas ipse nunquam scripserit. ejus rei satis magnum argumentum esse, quod ipse in eorum potestatem venerit. quod si alia etiam pigora Patres postulent, arces se sui regni, suosque libe-

*Franciscus
Gonzaga
Venetis sus-
pectus, im-
perio copia-
rum exui-
tur.*